

Guangjisi Minzcu Bau

ganhhau: CN45-0036 B.2016 Nd.4 Ng.27 liggaeuq bingjsaen nienz ndwensam ngeihcaet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3221期

Swcigih Minzveij Cujiy Lu Yenbenj Vih Hocouh Si Bazbugih Vangzdung Yauzczu Yangh Venjbaiz

自治区民委主任卢献匾为贺州市八步区黄洞瑶族乡挂牌

4 nyied 19 hauh, Swcigih Minzveij cujiy Lu Yenbenj daengj 4 boux bae daengz Hocouh Si, vih Hocouh Si Bazbugih Vangzdung Yauzczu Yangh ndaej daengz Guekgya Minzveij ancoh baenz “buek daihsam daengx guek minzczu doxgiet cinbu cauxlaeb hozdung yanghcin guhyiengh” haenx venjbaiz. Hocouh Si Yinzminz Cwngfuj fusicangj Vangz Cigvangh, Si Minzveij cujiy Vangz Swngcen, Bazbugih fugihcangj Loz Yangzswng daengj camgya le baez hozdung neix.

Vangzdung Yauzczu Yangh aeu minzczu doxgiet cinbu cauxlaeb hozdung guh hong cungdenj daeuj gaem, giendingh naek youq bingzciengz, naek youq hengzdoengh, naek youq gihcwngz. Caenh’itbough cauxmoq lohnaemj, aeu hong yawjnaek yinzvwnzva, dacung’va, cizdijva guh caijdij, hawj minzczu doxgiet cauxlaeb hozdung

engq miz rengzlix. Mbouj- duenh gyagiengz cauxlaeb saedyauq, giendingh gij saenqniemh “gak minzczu cungj dwg ranz vunz ndeu, daengx ranz cungj aeu gvaq hwnj saedceij ndei”, ceijyinx gak minzczu vunz lai aeu dungxcaiz caeuq rengz comzrom daengz coicaenh minzczu doxgiet, caezcaux gyaranz gyaunde. Doicaenh cienzmienh siujgangh doengzyamq, gunghung fugsah doengzcaet, fazci bauj-cang doengzgiengz, mboujduenh gyagiengz gij roxnyinh aeundaej gak cuz vunz lai, haenqguh haivat minzczu doxgiet cinbu gizmen moq. Bi 2013 doxdaeuj aen yangh neix ndaej swcigih bingz baenz “swcigih baez daihcaet minzczu doxgiet cinbu mozfan cizdij”, caenh’itbough ndaej Guekgya Minzveij ancoh baenz “daengx guek minzczu doxgiet cinbu cauxlaeb hozdung yanghcin guhyiengh”.

Youq seiz venjbaiz hozdung, Luz Yenbenj daezok geij diemj maqmuengh: It dwg aeu ceijyinx daengx yangh gak cuz beksingq doengzcaez baenzfouq, ndaej aen cwngheuh ndei neix dwg gij cwnggoj daengx yangh gak cuz beksingq doengzcaez gaenx guh, aeu ndaej mbouj ngaih, maqmuengh aen yangh neix laebdaeb guh ndei gak hangh hong. Ngeih dwg aeu guh ndei gij daegsaek binjbaiz Mbanjyauz, maqmuengh Yauzczu dajsiuq cungj dinfwngz neix ndaejswncienz. Sam dwg aeu vatcimh caemhcaiq swncienz minzczu vwnzva, muengh daengx yangh gak cuz beksingq caenh’itbough baujhoh caeuq swncienz minzczu vwnzva.

Doeklaeng, Luz Yenbenj caeuq si, gih, yangh daengj cujiyau lingjdauj doengzcaez vih aen yangh neix biengjbaiz.

(Lanz Siengcauh/蓝翔超 Mwz Ginjswngh/麦谨生)



Yungzsuij: Myauzczu Labnyumx Haeuj Hagdangz

融水:苗族蜡染进校园

4 nyied 24 hauh, Yungzsuij Myauzczu Swciyen Vwnzlenz, Gyauyuzgiz daengj danhvei youq Yen Cizyez Cunghyoz banh Myauzczu labnyumx haeuj hagdangz haiban yizsi, 40 lai boux saujsu minzczu hagseng, lauxsae aeu Myauzczu guh cawj haenx faenbied camgya le Myauzczu cugnymx. Myauzczu labnyumx daengj dinfwngz ndawbiengz beizyin, swncienz minzczu vwnzva. Ndaw doz dwg lauxsae son hagseng guh Myauzczu labnyumx.

(Lungz Linzci/龙林智)

Siengcouh Yen Gvangqlangh Haiguh Ndawbiengz Yungh Caeuq Senhconz Vah Saw Minzczu

象州县广泛开展民族语文的社会应用和宣传

Siengcouh Yen youq seiz haiguh bi 2016 “sam nyied sam Bouxcuengh” caeuq “ndwen senhconz minzczu doxgiet cinbu” gak hangh hozdung, gvangqlangh yungh Sawcuengh caeuq haiguh gij hozdung mizgven Sawcuengh, caenh’itbough gyagiengz ndawbiengz yungh vah saw minzczu, haenqrengz senhconz le cwngcwz vah saw minzczu.

It dwg gvangqlangh yungh Cuengh Gun song cungj saw guh senhconz. Gij vengzfuk, baengzmuq, banjbau baudou, senhconz swlhliu byauhdiz daengj

cienzboh hozdung ndwen senhconz caeuq “sam nyied sam” cungj yungh Cuengh Gun song cungj saw. Ciuq mbouj cienzbouh doengjgeiq, gij vengzfuk, baengzmuq daengj yungh Cuengh Gun song cungj saw miz 200 diuz doxhwnj, hawj cwngcwz vah saw minzczu ndaej gvangqlangh doigvangq caeuq senhconz.

Ngeih dwg cujcz haiguh Sawcuengh caeuq Vahcuengh gven-daengz hozdung. 4 nyied 6 hauh, aen yienh neix youq song vah saw hagdangz guhyiengh Daloz Cungsim Hagdangz

banh sij, doeg Sawcuengh caeuq ciengq go Vahcuengh doxdax, daengx hagdangz lauxsae hagseng caeuq dangdieg vunz lai yiengjsouh le baez vah saw minzczu hoihhoengh ndeu, aeundaej yaugoj gig ndei. 4 nyied 13 hauh, aen yienh neix Majbingz Cin banh cangh-fwen Fwencuengh beizyinbanh caeuq Fwencuengh doxdax, 60 lai boux bouxyaeg Fwencuengh camgya beizyin caeuq doxdax. Doenghgij hozdung neix caenh’itbough doicaenh le yungh caeuq swncienz Sawcuengh Vahcuengh.

(Veiz Veimingz/韦卫明)

SIUSIK DINJ

简讯

● Bineix guh hong cingcinj bangcoengh seiz, Gunghcwngz Yauzczu Swciyen laebdin saedsaeh, yungh cwngfuj bued saekdi, danhvei baihlaeng bangcoengh saekdi gyalai bangcoengh ranz miz vunz ndangcanz, ranzgunz-hoj, doengzseiz gunghsangh cizgenh bumwnz gujli gyoengqde yungh gij hingzsih hozcozse doengzcaez vut-gungz baenqfouq. Seizneix, aen yienh neix miz nouhaet, byaekheu, gyagoeng daengj hozcozse 56 aen.

(Cauh Binjciuh Cau Cwzginh)

● 4 nyied 1 hauh daeuj, Fuconh Yauzczu Swciyen aeu “doxgiet haenqguh coi yat-hamj, huzndei hwngfat haeuj siujgangh” guh cawjdaez, roengzsim cujcz, cauxmoq senhconz caijdij, gvangqlangh haiguh ndwen senhconz minzczu doxgiet hozdung, doicaenh daengx yienh minzczu doxgiet cinbu.

(Dwng Vangzyi Vangz Yiyungz)

● 4 nyied 20 hauh, gyoengq vunzmbanj Yungz-anh Yen Daliengz Cin Lungzsanh Cunh nyaengq ndaem haeuxnaz. Seizciet “goekhawx”, fwn raemx cukgaeuq, habsik doenghgo maj hung, Liujcouh Si gak dieg bouxguhnaz ciengj guh seiz dajndaem neix, youq gyang reih gyang naz nyaengq, vih bineix haeuxnaz fungsou dwkroengz giekdae maenhndei.

(Cinz Ginghoz)

● 4 nyied 21 hauh dwg ciet fwen conzdungj Dwzbauj Yen Lungzgvangh Yangh moix bi gvaq baez haenx, geij fanh boux vunz daeuj hawfwen, Dwzbauj Yen Minzczugiz cungfaen leihyunh aen seizndei neix, haenqrengz haiguh minzczu cwngcwz fapgvi senhconz hozdung, ndaej daengz vunz lai haenhndei. Hozdung geizgan, gungh fat minzczu cwngcwz fapgvi senhconz swlhliu 1000 faenh, ciepdaih minzczu cihsiz vwndiz camcaz 112 vunz lai.

(Nungz Yungjfang)